

نداءات وردشانية

شعر

أشرف الكردي

رئيس الإدارة المركزية لإقليم القناة وسيناء الثقافي

خورشيد على عبد المجيد

مدير عام الفرع

محمود المنير

مدير التحرير التنفيذي

مدحت منير

الإخراج الفني

هانى خمس

التدقيق اللغوى

خالد صالح

المتابعة الإدارية

جيهان دياب

لجنة الإجازة

أ/ عبده أحمد المصرى

د. طاهر محمد الهادى

بورت برس للطباعة - بورسعيد

ت : ٠١٠٥١٠٩٣١٥ - ٧٧٦٠٠٥ (٠٦٦)

إهداء

إلى أمي الحبيبة .. إلى أبي الحبيب
إلى حبيبي / هبه احمد دندر
إلى أخوتي .. إلى أصدقائي .. إلى من أحب وكل من يحبني
أهدي هذا العمل

أشرف خالد كردي

صوت

ملاح
تجعيد
يا ورد شان
حلمي البعيد
القطر عدى
ولا انقطع بنا الوريد
يا ورد شان
سبت الورد في اليم
مليان ... ندم
وصاف كلامي اللي اتعدم
شايل ملامحي م العدم
يا ورد شان
رغم الأمانى اللي انتهت فوق الرصيف
بتمنى تاني وبوعدك
مع إني عايش

في الخريف
مش هي دي المسأله
المسأله
إن احنا لسه ع الرصيف

يا ورد شان

عقدة

عناقيد

عقدة .. عناء ايد

عقدة .. عناء قيد

يا ورد شان

في الشط البعيد

موال وظل

ومن الطريق .. فوج كلامك رعد

زهرة كلامك ع الشفايف

وانا كنت خايف .. لتقولها

اخر الطريق

اخر الطريق .. بيتي المهدم

بين النجوع .. م القدم

نادى على الكروان

رد الندى بالنعم

يا ميت ندم

ع اللّٰہی اتظلم
ولا قالش "لا"
ولا قال "نعم"

يا ورد شان

دورت ع الشاطر حسن
ما لقيتش غير الغول حسن
فجريت حدي التباشير
احذر شهرزاد
ما لقيتش غير العمر
والشهر اللي زاد
ولقيت حكاويتنا القديمة
بييعها ... المزاد

يا ورد شان

رغم إني لفيت
في المسالك والحواري
وعرفت كل الطير اللي ساكن في البراري
لساني مش عارف لي دار
ولا حتى عارف مين جيرانني

يا ورد شان

دورت في السكه
ملقيش غير فكه
النسر طار منها
وكتابه مكتوبه
اقلبها مكتوبه
اعدلها مقلوبه

يا ورد شان

عهد الأمان
اللي انتي حامله بيه
أنا برضه حامل بيه
بس الخيوط السوده
وشباك السكك
خلتني عايش زي طيري اللي اتمسك
وصبحت مخنوق في الشبك

زي السمك

يا ورد شان

عهد البوار اللي انتي عايشه فيه
انا برضه عايش فيه
بس انتي عارفة ليه
يمكن سطر السكوت
جمع حروفنا
يمكن تكون الورد ماتت
لما خوفنه

يا ورد شان

دفعه
ومجدافي اتكسر
وأنا كنت طالع للقمر
لكني مقدرتش أطوله
ف فضلت وحدي

فوق جبال الوهم
مستني الأمل
لجل إنه يتزل
يوم وأنوله

يا ورد شان

اسمك
والنصيب بحار
دوخي في البحر الدوّار
وصبحت خايف م الشبار
والخوت
شدت لساني
ع الكلام والصوت
أنادي
ع الفلايك .. والشطوط
ملقيش غير الدوامات .. والخوت

يا ورد شان

البحر لو صافي
يبقى الكلام دافي
ولساني مجدافي
صياد ورحت اصطاد
لقيت كل السمك
له برضه أهل .. وبيت
مش عيب .. أكون صياد بلا أماره
العيب أكون طعمه في صناره

يا ورد شان

ساعة الادان
تلمع نجوم الليل على جسور السنين
في كفوف كفيها الخوف
على كل البيبان
يا ورد شان

متحيرين بين الخرص
والصوت لسان
يا ورد شان
حيرانه موجة شط بين الضفتين
غرقانة .. كيخوت السنين
ومغرقانة ساعة الادان

يا ورد شان

كنا زمان
نجري ونلعب
في الطرق
ويدلعونا بالكلام
ويلعبونا بالورق
كنا بساط
واتغيرت كل الصور
لون القمر
حتى الشجر

وصبحنا تايهين في البدن
مليون سؤال ولسان يخاف م الأجوبه
ساعة الضحى
وارجع واقول ...
يا ورد شان ... كنا زمان

يا ورد شان

الليل بساط ...
مفروش على صدرين
والهم هاتف
رايحين لفين
والصوت حزين
وبتلعي نبرات البكا
إمتى بقى
راح نعترف
إن احنا
جوه الشرنقه

لحظة شتا

مطر الحروف
خلاني اشوف
الشخبطه فوق الجبين .. عرق السنين
بنبات .. نبات
نصبح . رماد
يطلع جماد
ويموت ربيع
نضيع .. نضيع
نبيع .. نبيع
بس التمن .. كان ع الزمن .. لحظة .. شتا
لحظة شتا
كان الشتا
لامم .. شتات .. مشتتا
ومحني كفه من نبات
دخان فتاتي .. اللي اتشقى .. لحظة شتا
لحظة شتا

كان الشتاء
راسم ملامح ع الندى
يطلع ندا
ويموت ندا
لكن بصوتي اللي تندا
حنده على النور
والشطوط
واحلم بيوم الشمس
تطلع م التبت
ويغني قطر السكه توت
راح تنتهي
لحظة شتا
لحظة شتا

عابر سییل

حدوته .. توته
التوته .. ضله
والقعهده في السهرايه
وسفينه ماشيه في القنايه
عدى النهار عابر سبيل
وسألني آخر سكتي
الليل ضنى
يا همار يا موال الغريق
الفجر ريق
وسألني آخر الطريق
عابر سبيل .. الكلمة دارك
يا حق عايش .. في احتضارك
الضلمة آخر سكتك
مين سكتك
الغربه .. طول الانتظار
صياد .. أنا

فارد .. شراعي في القنايه
الطير يسبح ربنا
الفجر آيه
في الفجر لمتنا الصحابه
غنيت على الناي وربابه
مغرم صبابه
الدنيا عند الشط غابه
ديابه تعوي لديابه
وانا حظي يابه
في القنايه .. بمركبي الخشبيه
شايف على الشط الديابه
بالدور عليه
وبعيد انا
والشط آخر سكتي
يعني النهايه
تاني حرجع للبدايه

المرسى شطي .. وغربتي
البحر آيه
صياد أنا البحر في ضلوعي
الطير يرحل بالضئ
يا خوفي .. يا قلوغي
الشط قرب منينا عابر سبيل
عابر سبيل
الكلمة .. والبنه
باضت حمامه .. القنبلة الذريه
وحمامه طايهه في السما
نادت عليا
شيله الزتونه .. في بقها
والقمحه .. والسكينه
مسكينه .. مسكينه
الجرح لينا
الجرح فينا
والتوته .. توته
اهي هيّه دي الحدوته

کابوس

كان ليه بيت
بين البيوت
عشعش عليها العنكبوت
ودخلت بيتي
لقيت خيوط
فتشت فيها
لقيتها موت
فمشيت على الدرب الحزين
وسألت عابر
قليّ مين .. ساعتها شوفت
الدنيا لفت والسنين
طلعت فوق السور أناادي
والنهار وراي ساعة
يومها بعته
شوفت نجمي

في ليل مسافر
القمر راكب سفينته
شوفت بحر الحب
راحل عن مدينتي
فجريت على المينا
أدور في سفيني
قلت أرحل
ولاً أهاجر
ولحق الطير اللي هاجر
بس معرفتش اخطي
قلت بخي .. فيكي
لكن
ضيك اني اللي اتملى
في الليل سكات
أو عيونك دمه عايشه
في اللي فات

شمسك انتي الليل
بتكتب بكرة مات
عايزة أشوفك
امسحي حرف .. فحروفك
عايزة أشوفك
بسمه في عيون اللي عاشق
قلب دق
ألف كلمة ألف معنى
ألف حق
نور بينده بأعلى
صوته .. يقول لعهد المصلمه لأ
وإن كنت أنا
عصفور صبور
مش حقد افرح جوه سور
وإن كنتي عوزاني أثور
علميني ازاي
مخافش
من النور

طالع

من الطريق الصعب
اخترت موالي
موال .. وفارد ع السطور كلمه
يا طالع .. النجمة
هات لي معاك قمره
يا طالع الشجره
هي الحروف م الخوف
ولا الحروف ثمره
يا ورد يا لون الحدود .. والدم
بحلم .. وغاوي
باعشق غناوي الفجر
بيتي .. وصوتي
واكره سكويتي
لما أشوفك
كل العرايس ع الشطوط

والبحر داكن
كل الكلام ع الصوت
ولساني ساكن
منين أجيلك
بس يا جنية
كبرى السكات
صبح الطريق للبحر ومعديه
يا طالع الشجره
امرة .. وتجمعه
يا طالع القمره
ليه السما بعديه
يا طالع .. الطالع
طلعتي .. للطالع
النجم مش لامع
موالي غنيته
صعب الكلام
لكن
هو اللي مش داكن

غيطان العنكبوت

ورد غيطان العنكبوت
الحزن جوايه
يا رقصه في عيدان الصبايا
الضحكه ماتت والحكايه
مين اللي رسم اللوحه
في جبينك حزينه
حنقع صفاير حنا
في الشمس والميه
واكتب على جبينك
صفى
يا رب حنيه
وتموت قلوبنا السوده
والبس له جلاليه
بيضا
سواد العمر صوت .. المنحنى
حنموت هنا

جنب الرماد .. والشوك

وضهري اللي انحنى

يا حينا

شغلت خيوط العنكبوت

على الشطين بكا

وحتنحكي

واشهد يا ليل الصبر

في غيطانك تعب

الرحمة بقية عمله

في ادينا البخيله

والليله غنى العنكبوت

ليله

اترص يا خص

جه دورك

صوت المآدن والبيوت

أدن وقال توبه

الكل قال توبه
ومشينا من الناحيه الشمال
الكل قال نوبه
ورد غيطانك
حزن جوايه
ورجعت تاني للمرايه
قلنا الحكايه
الف مره
ورجعنا نبديها

ميلاد كلمة

صبح الصباح المر جواكي
بيهو اكي
وينسى الفجر
إن الديك .. سبق ضوؤه
وانه اتوضا جواكي
دواكي المر في إيدينا
بيدينا
ويسقينا كسات الصبر
وانا تايه على شطك
ينسيني الألم خطك
وحتكتب بالدموع شيلة
أنا والغربة والعيله
طويله
يا ليالي الغربه في بلادِي
وعوادي
صبح غنى الصباح المر .. في الوادي

سمعت كثير .. على شط الكلام الخلو

والمعنى

وانا صياد الشعر والمعنى

حتسمعنا

ده حلم الليلة .. والعيله ميلاد كلمه

نبتدي متين الحكايه

من دموع البحر

ولا صبر أيوب للنهائيه

حبتدي من بين شفايفك

ويا ذكرى الأمس في عيون الخلائق

حكيتك كلمه

في ليلة صبر أيوب اللي قايل

شايل حولك والله شايل

؟

متسنيش يا أمي كلمه في الزحام

ومتسنيش بين كلام الحق

لمه حتتولد كلمه
من بين شفايفك
وانا رايح أجيب البرجيله
وأفك من بين الضفاير سلسله
واكتب على جفن القمر
كلمة سهر
وامسح دموعك .. بين ضلوعك
اكبري
حريري من سكوتي
طلعي م القبر صوتي
احكي قصة صبر أيوب
اللي طالت وانتهت ويا السلامه
والعلامه .. ابتسامه
بعد صرخه
صرخه المولود
وأم بتبتسم

بعد الألم
والنعم
يحلنا قصة بتولد
وحتولد
من بين شفايفك كلمه
جوايا
تتلى الآية .. وتخرج المعجزات
يطلع أيوب .. في النهايه
بعد صبر الظلم فات
يا مه ضمني في صدرك
عوذيبي من شيطاني
واكتبي بالكلمة اسمي
لجل ما تعيش الأماني
غني يا مه
ده حنا له
ويا الكلمه

لما تكبر كل شيء في الدنيا
يكبر
قومي ياله
قولي ياله الله أكبر

برد و دفا

ساعة ميلاد .. الحلم والشقشقه
نلبس جلاليب .. الشقا
نطلع جبال الشرنقه
بعد سؤال
كان الجواب .. نازل بجبل المشتقه
برد ودفا
آه يا صفصافه
آه يا ورق خواف
آه لو يصفى البحر
للأصداف
إيد وقيد
وسور حديد ممتد
والخافه والمنحدر
جنب الحجر ييطوف
خوف
وخوفو

وهرم
تترل جبال الهرم
بين الهديل والعلم
تكسر سنان القلم
خط القلم
موجوع
مليته يكتب عروسه
والبدر متذوق
كتب الهلال موال عرق
افرد بساطك ع الورق
واربط حبالك في النجوم
المرغمه
اليل غرق
مليت كلام القلم
وكتبت بتباشير
شكل الكلام اتغير

ولقيني برسم بير
واكتب كلام حقاني
يا خطوه
يا مسيقاني
بين افتراق الخلق
ولساني .. صخور
بتدور الساقيه
واللي باقيه في البراري
ولن تدور
كل العواصف السنه
والدرب مصلوب ع الجدار
زي الصور
علل علو السحب
بعلو القمر
انزل يا ليل المنحدر
دور تراين الصور

تلقاني تيار
فوق غلاف الارصفه
ورجعت ادور عن صفه
مليت كلام الحلق في الحلقان
ولقيتك اني في الهلال
بين الجروم المظلمه
وصبحت شايف
نجمتيكي المعقودين
بين الضفاير .. والسما
ولقيت مواويل الحروف
بتشد حلقي من السكات
نزلت تجاعيد البلح فوق السوبات
مع إني خايف م الصوابع والزناد
شوفت النبات
فك الضفاير م البناني والبنات

سلاسل

الصبح . ليل
السلسيل
حلم البيوت الحيرانين
بين الكوايس والدعا
يا مدمعي .. قلب الحجر
- ساعة الدعا .. يتزل المطر
بيرتل الليل ع النجوم
ويحوم كلامك ع الشجر
واخرج أنا .. من ليل لليل
أحلم بمحلمك .. سلسيل
والسلسيل .. حلم البيوت
طارح سبيل
بس الغليل
بيقور سلاسل ع الحيطان
وبيعقد الحرف اللي منطوق ع اللسان
ويحني شمك م الشفق

ساعة الشروق
يا مدمعي قلب الحجر
كل النجوم شايله الهموم
تحضنا بالمواويل دعا
يا مرجعي أصلي لسؤال
ليلك فهار
بيفتح النوار شرار
ويعفر التوب بالذنوب
يا مجمعي كل الخلايق
جوه توب
السلسيل
حلم البيوت مكتوب
على كل الدروب
مكتوب ح !
سلاس

وعد

الكلام الخلو راح
وآهين وآه على الجراح
قداامي صورتك والخلق
ماسك لسان الفجر
وعيون الصباح
قداامي .. شايفك
بس معرفتش افوق بين عنيكي والقزاز
برواز
وفكري بيلك
والسواقي .. والسنايل
برواز
وصورة ضفتين
وحمامه شايله الموت سلام
برواز
وصورة هم في اليم القزازي
قالت : غوازي الليل نجوم المنحنى

كانم هنا
قالت : أنا غاوي الصيام والاعتكاف
في المرحلة
قالت : لما ميلت اعتكافك في المعاجم
قمت دورات الترايين
اللي دير ه .. فوق لساني المنحني
ملقيتش غير النار
على جبين المناجم
قلت انا راسم هاجم ع الشطوط
قالت : طريقك ضفتين
أولها موت
قلت : الخطب
قالت : رماد
قلت : الكتب
سكتت وقال الغار
حمامه .. وعنكبوت

ردت بيوت الحي فوق غصن الشبك

قالت : نجاة المصطفى عشرين

حمامه وعنكبوت

قالت : الفرق

قالت : شباك الصيادين متلوته

قالت : هنا باضت حمامة .. المنحنى

عید

عيد وعبيد
وإيد النار .. فهار للشمس
ودموع الصباح .. والأمس
ويا نخلتين
العمر فين .. ضاع
العيد .. يعيد . ليالي الفرحه من تاني
وأحزاني
تعيد العمر وياها
وأنا طيفك
سنين فرحك
سنين خوفك
وأول حرف في حروفك
وأول نور على عنيه
وعمري اللي انكتب ليه
ونفسي بعمرى أفديكي
توهني حكاويكي

نعيد في العيد حكاويتنا
جراح البحر والمينا
ترسينا .. حكاويتنا .. على جرحك
وجرح جديد
أمد الإيد .. فمار شمسي ترجعني
دموع أمسي
لجرحي اللي انجرح فيكي
تبكي .. وابكيكي
أواسي عنيه بعنيكي
أمد إيديه لكفوفك
تدوب الرعشة فإديكي
تدوب فيها
تدفيها وادوب فيكي
ونتزل للأمل
غلي ليالي الفرح من تاني
أغير توبك الباكي

وأنسى شوية وياكي
دموع البحر ودموعك
أقول للنخل ولطميك
بعوده وعوده ونعيد
عيد

عواد

دمعك .. شجن
من غير تمن
حتى الزمن راح يلعنك
تدفع حسابك
وتسد بابك
قهوة السجان عليك
ترسم ملامحك ع الكفن
مستني يومك .. حينديك

م الشعبه للمرمطه
يا قلبي لا تحزن
منقوش على صدري الرصيف والبرد
والكلاب الشارع بتهوهو
من بره السد
تطلع .. وتطالع مطلوعك
وتخفي دموعك في دموعك

تتكلم وكلامك .. جوعك

على فين وخدانا الأيام !

أصنام بتحاكم أصنام

الشوك الناشف إخضر

صوتك .. تصويتك .. وحديثك

من اصل مالوش أي أساس

وسكوتك

ملهوش تبرير

غير انك .. ملكاش .. إحساس

انبعت رخيص

فمتسألش

إتبع خلاص

حتقولي لمن

إسأل نفسك

أو أدخل في عيون أولادك

حتلاقي ميلادك ووفاتك
والقطر اللي ما عدى وفاتك
حتلاقي تاريخك منقوش على ضهر
الكرباج والحوش
ووحوش بتخلق في عينك
راح تبكي
حيفيدك ايه
حتخاف
أنا عارفك خواف
وما تزعلشي
أصل أنا خواف زيك برضه
لكن بدايق لما اسمع
"عواد باع أرضه"
من يومها أنا بكره عواد
وبلف على ولاد الحته
إياكم وولاد العته

لو طالك خلاك .. عواد
والناس حتغيلك عاد
"عواد باع ارضه" يا ولاد
شوفوا طولہ وعرضه
يا ولاد

عمكو عواد راجل طيب
لكن ع الناس كان بيعيب
كان عايز يركب طياره
يمشى ويتعاقب في الحاره
يلبس بورنيطة ونضاره
عواد بقى بيه
وعيون ناس بصة عليه
من يومها معايا بيتشعبط
من حيطه .. لحيط

من يومها معايا بيترمرط بين التواييت
من يومها وانا بكره عواد
وبلف على ولاد الحته
إياكم وولاد العته

شقی

صوت
وسكوت
أنا اللي طالع من جبال المستحيل
بأذن في البيوت الشقشقه
شقشق شقي
في الفجر والليل واللقا
في البحر والنور والنبات
في المستحيل .. والمر .. ودموع
الساعات
طب علميني إيه معاني المفردات
البحر تايه بين ضلام الليل
بيستنى اللقا
البحر مخنوق بين ضفاف الشرنقه
والمستحيل يطلع نبات
من بين حبال المشنقه
شقشق شقا

شق شق شقا
شاء شاء شقا
المر دابر في الكاسات
اللافتات
تعلني ع الشط العيد
يندهني صوتك في الجليد
يرسمني تمثالك .. العيد
أحلام .. وديره
في السواقي والكاسات
مخنوقة بين الأمنيات
مجروح بلملم في الفتات
والقي الملامح .. فجر تايه في اللقا
ولقاكي انتي بين خلايانا الرحيق
والقي الحريق
جوايه .. صدري اللي انجرح
واكمني مشتاق للفرح

لساي بحلم بالرحيق
برسم خطاوي الفجر
بالنور البريء
باكتب حروف الخوف
على السطر الجريء
مع إني خائف م الحريق
والمر والكأس .. اللي داير ع الطريق
حفضل أأدن في البيوت الشقية
واحلم
مع الفجر اللي حالم بالشروق
إزاي أعديكي الشقا

ورد الجبين

ورد الجبين ع الخدمات
وانحنا ساق الشجر
المطر نازل يصحي الدمعة .. والباكي
سواقي بتسقي في جنينة عذاب
وانا ع الشط .. والميه
باكلم كل جنيه
وانا قاعد بدون ظل الشجر والشمس
بتجمع كل نار الامس
اصل الحكايه
يا امير الجن .. جوايه
زمان
كان الشجر طارح في حتنا
بينور الفرح بيتنا
وغيطنا .. وكل دنيتنا
وكان الأصل .. والمعنى
يسمعنا .. كلام الحق

يوجعنا الفراق .. والظلم
ويجي الليل
ونتجمع في حضن الأم
وياما كان مطر يترل
ويتزلزل جدران البيت
ولا بتنا انحنى جداره
ولا شجره انكسر عودها
حنان القلب .. عودها
بأن الأصل في وجودها
إيمان إن الحياه وعيلة
وضليله
زمان كان يا أمير الجن
قلب يحن
ويسبح ويفرح من طلوع الفجر
يتوضا
يشوف الدنيا بكنوزها ذهب فضه

صلاة الفجر

بعد الفجر

شايلى فاسه كراسه انكتب فيها رضى ربه

بلاش نحكى

وليه نحكى ما دام الغد كله جراح

كلاي يا امير الجن فى امبارح

يصلح للامل مفتاح

فكي الضفاير

إغزل .. يا صياد الشبك بين الدواير

الحب جوه البحر حاير

البحر جوه عينيكي داير

فكي الضفاير

كلمينا

- بحار وتايه بالسفينة

والكلمة جوه عينيكي مينا

طب كلمينا .. علمينا

كلمينا .. على مينا

وإن كنتي فاكره

فكريني باسمك الصياد

لفيت بنيلك ع العباد

وشربت من فورك عسل

ليه يكسروا المجداف

حداف في إيدي والسملك أكيل

صياد وراضي بالقليل

ناديت عليكى
كتبت اسمك بالصدف بين الرمال
موال ورا موال
صياد أنا .. البحر .. والجنيه
وحمامه قاعده في عشها بتغني للبنيه
انا عايز أعيش زي السمك في الميه
زي الطيور في السما .. والنسمه في الفجريه

الطريق

صبح الصباح
بين النخيل .. والبناني
معقود لساني
وانا اللي معقود ع الحلق
مرسوم على جدران الشفق
على غصن الزيتون
مسجون وسجنك في البدن
مرفوعه إيدي فوق حيطانا
غنيت تراتيل الحواري
والصواري .. والزمن
ما بعدت .. بعد الشطوط
مبسوط يا كفى
ولا ده علم السكوت
مفحوت يا جرحي
ولا عدت ع الضلوع
خط الرجوع

عد القلوع .. يا مركبي
السكة عديت فوق تابوت
والعادة يا غصن البنفسج
فوق حيطان الموت بينسج
عنكبوت
عنكبوت في الليل يغني للبيوت
يا توت يا قطر
السكة عددت ولا صدت
يا ضله ضلينا .. الطريق
ولا ده هو الطريق
نفس الطريق في الليل
مشيته من زمن
ودفعنا لليوم التمن
كان الكفن فوق الشفايف
والإيدين
حتى العينين محطوط

عليها حجاب وده .. علم الطريق
يا طريق محفور في وسطك
بئر غريق
يا غريق
محتاج لقشه
مش لفرشه ولا عشه
يا عش عاشت فيك حمامه
يا حمامة فين زتونتك
وديتها
يا تيهه توهنا فيكي توهه
في سنين فاتوهه .. الأهل لنا
يا حزينه
لساكي فاكه العمر لنا
ده انا لسه فاكه يوم رحيلي .. والسفينه
وسؤالي مكتوب ع الصواري
امتى يصفى العمر لنا

حیبة

كتب القلم في عينيكي ضحكايه
حوصف جبينك بالقمر بالنجمه بالايه
شالك على الخد الجميل غنى
كحل رموشك ليل
خدك بسمه فمار الزهره والخنه
يا ورد البساتين
إتميلي فوق غصنك
غنى لسواد الليل
ورى القمر حسنك
يا سلوة الصابرين
صبري على جيني
شبال حمولك تعب
إياكي تنسيني
زارع فدادينك عنب
بارت فداديني

والقلب من كثر التعب
كتب الجواب عيني
كتب القلم ع الضفتين زحمة
يمكن قلوب البشر
خليت من الرحمة
حبيبه
القلم
فاسي
وراح اكتب كلمتي لناسي
وناسي ناسين اكمني
رح ازرع وردة حتعيني
حبيبه
يوم ما تفتح
جروح الورده وتصرح
حتعرف إني كنت حبيب
بحب الكلمة والكراس

بجيك شمس في شروقك
بحب الناس
لانا بحلم بفستانك
ولا ليله في أحضانك
أنا بحلم أفك حزام
دمع الكبت في عينيك
أنا بحلم أكون ليكي
أنا بحلم أكون صحوه
تصحي الدنيا حواليك

رقصة

الفجر غنى
رددى الغنوايه
حنيت وريدي مديتلك ايدي
الفجر غنى
وبداية الرقصه
الشمس غسلت شعرها
بتسرح القصه
الطير بيحكى للعشش قصه
العش يهمس للشجر همسه
الشمس حيت .. ودخلنا في الرقصه
الرقم هادي .. عادي
وحادي .. بادي .. الدنيا من ده على دى
الطير سرح
الغنوة مش غنوة فرح
غنوة شقا
الشكوى بعد الشقشقه
الشمس حيت والنهار اتعري
الرحمة تاهت في انشطار النذره

نص النهار دوار
ودار العمده والبلديه
الهمس غاطس
تحت سطح الميه
الهمس طافي
فوق الجين الودودة
كرباج وسايس للندي
يا صحجي إدي اللجام للعرجي
خلينا نمشي .. تحت جسر التوت
نبوت عيلي للموت
الشمس مالت
لما مال البخت
شد اللجام .. يا عرجي
خلينا نزل تحت
عدى النهار
الضلمة نادت للديار
طلعت حدى
بعد الندى للفتح

فحت القبور الحلما

بعد اللحد

عدى النهار

دي نهاية القصة

عدى النهار

وخلصنا م الرقصة

بكرة والأحلام

بكره .. مين
يمسح .. الدمع الحزين
يرسم الفرحة في عنين المجروحين
بكرة والأيام .. وإننى
فوق حصان الحلم الأبيض
فوق جزيره بيت وشارع
نحضن الصبح اللي راجع بالنهار
تحضن النوار سفينه
تنفتح شمس المدينة ع النجوم
تمسح الليل اللي شايك كوم هموم
بكره والذكرى اللي فاتت
بس لو ماتت نموت
بكرى .. والأيام تعدي
بس متعديش علينا
نحلم الحلم في تابوت
بكره ... لون

بكره ... صوت
بكره ... صوت
بكره ... لون
مجنون أنا ولا الزمان مجنون
رسمك صفا
حضر الدفا
يحضر حكاوي الطين
يروى الشجر .. فيه حنان
يرسم زمان الحلم بالتواريخ
يرسمنا توتة .. وسقيتين
تروي الجوادب والحزين
لونت لون الحلم الأخضر
حفتين التين وشوكه والسنين
وطلعت لابس توب معفر
خفت أطلع من سكوت اللون
وأنادي بالجنون

خفت أهون ع الحلم صوت
خفت مش م الموت
ولكن من الظنون
خفت أهون على الحلم لما
يحضنك سطري اللي سما
ع الكلام
خفت من الأحلام عليك
خفت لو قلبي يناديك
يسمعك إيه تعب فيكي
خفت لو انه عليك متسمعيش
خفت أعيش في الكحل لون
خفت أهون ع الحلم صوت
وأنادي بالسكوت
خوفت مش م الموت
ولكن الظنون

عيلة

بس يمكن شوقي يسكن عندها
طب في النهايه .. حروح لها
وحقول لليل الدنيا مش قادر
أسافر غير لما أشوف الفرحه في عينيها
واحضن حنان الدنيا للي ساكن فيها
غناويها
صابر يا ليل الصبر إيه تاني
حناني وانعدم جوده
زمانى والقسا عوده
في كلمة الحق
إن طال القلم قال لأ
تنشق الحياه بركان
إن ضوء
القمر ع الأرض
يوم اتمان
ايه الحكاياه يا صبايا الجن مين غلطان

قالوا الحكايه في البدايه تفاحه
ادم وحواء فوق الجبين لوحه
ادم يبعد ربنا
وبكلمة مدبوحه
قالت له يوم حواء الحل في الراحه
والأصل تفاحه
مين اللي جاب الأصل والمعنى
والكون يسمعنا
إن الحياه بقيه كلمه بلا معنى
قالوا لنا في ليله
حتحن ضليله
تبقى الحياه عيله
آدم حيتعلم ان حب يتكلم
يتأني في القوله
وإن كيل القوله .. يصدق في تكيلها
يا ليلي

يا موالى
يا جفن القمر فى اللىل يا بحر الضنا
حتكلم عننا
عن إسمنا
عن حرف ضايغ مننا
يا دنيا من علم صغىر السن
إن الحياه قوله
هنكىل القوله
كلمة وحدوته
يا رب يا ربنا
اكتبنا فى النوته
ان احنا من صغىرنا
صابرىن على شطك
يا دنيا يا غربه
حنعلم الصحبه
إن طالت الكربه

لينا إله عالم غيوب الدنيا والآخرة
يا فرحه متخره
هتروحي فين قربي
يا حق متاخر
وصلنا للآخر
ما فضليش غير كلمه
إن صح معناها
تبقى الحياة ضلمه
ناوي الرحيل يا مه
وحسيلك الشيله
وأتمنى أرجعلك ألقى الحياه عيله

الإصدارات السابقة

- ١- حدث أن (مجموعة قصصية) جمال عبد المعتمد
- ٢- رسالة اليها (شعر فصحي) منتصر كامل مراد
- ٣- ١٩٦٧/٧/١٥ (شعر عامية) محمد يوسف أحمد
- ٤- زلات القصاد (شعر عامية) أنديرة محمد عبده
- ٥- كلمات (شعر عامية) جلال الجيزاوي - صلاح نعمان
- ٦- مرايا الوقت (شعر فصحي) ابراهيم محمود
- ٧- نرفاتا الليل الأزرق (شعر فصحي) أحمد عبد العظيم
- ٨- سابعة في عروقي (شعر عامية) فاوي الشريف
- ٩- محطات للحزن (مجموعة قصصية) محمد عيسى القيرى
- ١٠- علاقات (شعر فصحي) ياسر محمد عبده
- ١١- أوعاكي يامه (شعر عامية) على نظير هويدي
- ١٢- الناس معادن (شعر عامية) أحمد خليفة
- ١٣- كوابيس (شعر عامية) عماد الخطيب
- ١٤- لسانا بنعافر (شعر عامية) محمد راضى
- ١٥- على ضفاف الزكريات (شعر فصحي) عبد الحلیم سالم

- ١٦- مدائن النوم الردي (شعر فصحي) خالد صالح
١٧- عزف منفرد على وتر مرضى (شعر عامية) إبراهيم عمر
١٨- ضماشر الغياب (شعر عامية) عبده المصري
١٩- خذ للوجع صورة (شعر عامية) عبد الرحيم البنا
٢٠- أحلام وسكاكين (مجموعة قصصية) محمد عيسى القيرى
٢١- إبداعات من الزمن الجديد (شعر عامية) عبد الرحمن شوقي
٢٢- ضحكك فأدركت الفراغ (شعر فصحي) السيد إمام إبراهيم
٢٣- صدقيني (شعر فصحي) عبد النبي شلتوت
٢٤- سكة سفر (شعر عامية) أحمد السيد
٢٥- أول حروف العشق (شعر عامية) إسماعيل سعود
٢٦- نعمة وصحبة ورد (شعر فصحي) أحمد إسماعيل
٢٧- من ليالى النزيف والموت (شعر عامية) سيد عباس
٢٨- نخل الهموم (شعر عامية) فتحى نجم
٢٩- بره الحدود (شعر عامية) محمد رشاد
٣٠- لاشئ في المرأة (شعر فصحي) أحمد مطاوع